



● EDITORIAL ● RAL VENG TU ● CHHUNGKAW CHANCHIN

✚ ATC-ah Pathian thu lama doctor zir theih a ni dawn ta

✚ KTP Rorel Inkhawm thu leh hla

✚ PC Wales Moderator a lo kal ✚ Hmeichhe Inkhawmpui Lian

RNI 68092/83 Regn. No. N.E. 1024

From

Synod Literature & Publication Board

Synod Office, Aizawl - 796 001,

Mizoram. Phone - 0389-2324590

SYNOD Newsletter

Volume XXVII

No. 354

E-mail : synodnews@gmail.com

MARCH, 2012

SYNOD EXECUTIVE COMMITTEE-IN SYNOD INKHAWMPUI THU A BAWHZUI



Thil chi hrang hrang 20 velah ruahmanna siamtu tur ruat a ni a,
an ruahmannate SEC Meeting lehah thlir/ngaihtuah a ni ang.

Synod Executive Committee vawi 244-na chu ruahman lawk angin JM Lloyd Hall, Synod Office-ah February 26-28, 2013 chhung khan an thu a. Rev. Lalramliana Pachuau, Synod Moderator-in a kaihrui a, member an kal tha hle, 145-ah 139 an kal thei. Synod Secretary (Sr) Rev. H. Lalrinmawian rawngbawl na hrang hranga Synod chet velna chanchin a report hmasa a. Report-ah chuan Synod aiawha palaina tura tih zinga Inkhawmpui hman tawh Manipur Synod leh Zou Synod-ah te kal a nih tawh thu te, Synod 2012-in a rel anga Pastor Bial thar 10 chu January 12, 2013-a hawn a nih tawh thu te, Synod-in a dahna hmuna zirna leh chhan hrang hrang avanga la awm thei lo mi panga an awm avanga an Bial hmuitu tur ruat a nih thu te, Synod-in Department hrang hranga hotu a ruat tharten an hna an zawm thu te, Pastor leh Pro Pastor dah nghehna (induction) tluang taka tih a nih thu te, Missionary Pastor pariat leh contract missionary lak thar 103, an vaiin 111 lai, January 6, 2013 Pathianni chawhna Bungkawn Kohhran Biak Ina tirh chhuah an nih thu te, kangmei tuar mi 11 hnena Synod chhawmdawl na (Relief) pek a nih thu te, Christian Reformed World Mission (CRWM) nena thawh dunna thuthlung, kum thum chhung atan ziah thar a nih thu te, PC Wales-in an ngen anga Rev. H. Sangkhuma leh Rev. Z. John Malsawma Colney te term pawh sei leh a nih thu te, Aizawl Theological College chu Senate of Serampore College (University)-in thiamna lama doctor zir theihna tura a pawm tak thu te, Missionary Training Centre pawh affiliation an rawn pek tak thu te tar lan a ni.

Rev. Lalzuithanga, Synod Finance Officer-in Synod sum dinhmun chipchiar, fel fai takin a report baw a, a tlangpuia a lan danin thilpek rawngbawl naah hmasawna duhawm tak a awm zel a, Financial Year tawpawh chuan Budget khum a nih leh ngei beisei a ni.

SEC vawi 244 hian nikum kum tawp lama Chanmari Kohhran Biak Ina Synod Inkhawmpui rorel zinga SEC bawhzui tura dahte chu thu ngaihtuah tura chhawp chhuah zinga tam ber a ni a. A tam zawk phei chu rel fel nghal mai theih ni lo chi a nih avangin ruahmanna siam tur ruat phawt a ni a, ruahmanna an siamte chu SEC-ah thlen leha SEC-in a ngaihtuah leh tur deuh vek a ni baw.

Rel fel nghal zinga langsar zualte hetiang a ni:-

1. Mizoram Synod-in Presbyterian Church of India (PCI) General Assembly a thlen tum chuan a thleng tura ruat Kohhran chu Synod-in cheng nuai thuma tanpui thin tura tih a ni.
2. Pastor/Minister-te in luah man en that a ni a; in luah a tul changa Synod-in a tumsak theih tur chin siam thar a ni. State capital, District capital, Sub Division/RD headquarters leh hmun dang tia thliar in luah man peksak theih chin bithliah chu tihpun vek a ni.
3. Hospital dinhmun en thatna chu siam that ngai siam thain hman nghal tura pawm a ni a, Hospital hotu ber 'General Manager' tia thlak tura ruahman chu 'Director' tih zui zel tur a ni a. April 2013 atangin doctor-te hlawn za zela 50-in tihsan a ni ang a, a hma Millenium Centre-a an thuta doctor rawn man za zela 75 doctor-ten an chan thin chu chang tawh lo tura tih a ni thung a; chuti chung chuan he clinic hi tha taka kalpui chhunzawm zel tura tih a ni.
4. Kum 2013-2015 chhung atan Mizoram Presbyterian Kohhran Hmeichhe Inkhawm Lian Chairman leh Secretary ruat thar an ni a, Chairman-ah Pi C. Lalhmangaihi, Venghlui leh Secretary-ah Pi H. Lalpianthangi, Asst. Co-ordinator te ruat an ni.



5. Kohhran thil pawimawh chanchinbua chhuah chungchanga Officers' Meeting (OM)-in ruahmanna a siam chu pawm a ni baw. Hetiangin:-

"Synod rorêl pawimawh te, rel tura chhawp chhuah leh Synod/Kohhran mipuia nghawng tha lo nei thei tur thu reng reng Synod hnuaia chanchinbu leh internet-a chhuah tur chi chu mawhphurtu leh thu neituten an en dika rem an tihte chauh chhuah thin tur a ni," tiin (SEC 244:47).

6. Revival Committee-in Ram pum huap 'Pavalai Meet' buatsaih an duh thu an thlen leh a thlengtu tanpuina Rs. 1,00,000 an dil chu remtih a ni a; Pavalai Meet hman chungchang hi Presbytery level-ah chuan Presbytery Standing Committee-in a buatsaih tur a nih thu leh Bial chungah chuan Bial Standing Committee buatsaih thin tura rel a ni baw.

7. Synod Office hrang hranga thawkten ni tina hna an thawh hun chhung hetiang hian siam thar leh a ni:-

9:30 a.m. to 4:00 p.m. - October – February

9:30 a.m. to 5:00 p.m. - March – September

phok hnihna thlur hnihnaah zawm a ni

www.mizoramsynod.org

SYNOD Newsletter

EDITORIAL STAFF

Rev. K. Lalpiangthara (LPT)

Rev. Thangzauva (TZ)

Upa H. Ronghaka (HR)

Upa Khawlungnunga (KCN)

Editorial

ZIAK LEHCHHIAR

Chanchin Tha zâr kan zote zingah ziaik leh chhiar kan thiam hi a langsar pawl a ni kan ti thei ang. India ram state zingah ziaik leh chhiar thiam tamna ber pahniha niin 93% dinhmuna kan ding mek a, Pathian malsawmna ropui tak a ni. Pakhatna ni tura hma kan lak chhoh zel pawh a tha âwm e.

Mizote hi *talent* tha tak neiin Pathianin min siam a. Mihring kan tam loh ngaihtuahin mi thiam tak tak pawh kan ngah ve ta khawp mai a, thil lawmawm tak a ni. Hetiang kan nih mek lai hian thanna tur pawimawh tak tak chu kan la nei nual mai. A bik takin lehkhahu ziaikah hian tan lak kan la ngai khawp mai a. Ziaik thei tura ngaih, ziah tum lo hrim hrim pawh kan tam niin a lang. Kan hmeichhiate zingah lehkhahu ziaik tawh kan nei nual a, mipa lam aiin tan lak an la ngai nasa zawkin a lang. Ni tin chanchinbute pawh hi mipa kut ngah ringawt tur chu an ni bikin a lang lo. *Talent* tha tak tak Pathianin a pekte hi rawn pho lang tam deuh thei se a lawmawm khawp ang. Tin, mi thu ziaik chhiar hi taihmâk kan chhuahna tur pawimawh tak niin a lang. Bible chhiar te, lehkhahu tha chhiar te hi kan rinna tihchakna tur pawimawh tak a ni tih kan hriat thar leh a tha âwm e. Chhiar tam chu an fing nge nge thin.

WORSHIP SEMINAR PAPER A LAM THEIH E

Synod Worship Committee buatsaih Worship Seminar thu zir ho – ‘**Presbyterian Pathian Biak Kalphung**’ tih leh ‘**Pathian Biak Inkhawm Hruaina Bu Hman Dan**’ tihte chu a buin tihchhuah a ni a. Minister, Pastor, Pro.Pastor, Upa leh Tual Upa ten Synod Office, ‘Mamawh Lamna’ atangin lam theih a ni tih kan inhriattir e.

NGENNA

Mi mal, Kohhran leh Bial huapa lehkhah Synod Office dawrte chuan Phone nambar tar lan zel ni se. Kohhran leh Bial Letter Head-ah pheih chuan Bialtu Pastor phone nambar telin biak pawh theihna nambar pathum tal dah zel ni se a lawmawm hle ang. Lehkha reng reng Superintendent-in dawng khawmin Central Registry kalpui a ni tih hriat ni bawk se.

phek khatnaa mi zawmna

8. Aizawl Theological College-a USA leh Netherlands atanga Visiting Professor awm mekte chu Synod suma sponsor remtih a ni.

9. Thil man sang zel avangin Synod-a thawkte tan April 2013 atanga Living Allowance za zela 20-a tihsan remtih a ni. Field worker-te erawh chu an hlawh tihpun hlim chauh a nih avangin a huam lo.

10. Synod Information and Publicity (Synfo) chu sawrkar lam danin a phut angin Association anga Registration tih phalsak a ni.

11. Meitei Presbyterian Singlup, Administrative Unit-a dah tura ruahmanna kal mekah Unit Committee member tur mi pali ruat an ni.

12. Manipur Mission Field headquarters Imphal-a awm thin chu April ni 1, 2013 atangin Kwakeithel-ah sawn tura tih a ni.

13. United Theological College, Bangalore-in an College-a Registrar hna thawk tur deputation-a tir tura Mizoram Synod an ngen angin hemi atan hian “OM-in thawk awm mi zawngin lo bawhzui se,” tia rel a ni.

14. India ram pum huapa Kohhran/Pawl inzawm khawm, National Council of Churches in India (NCCI)-in 2014-a kum 100 an tlin lawmna senso puhruk nan Rs. 2,00,000 an dil chu pek remtih a ni.

MEITEI PRESBYTERIAN SINGLUP PCI ADMINISTRATIVE UNIT-AH

Mizoram Presbyterian Kohhran Mission Board enkawlina hnuai kum 40 vel lai an awm hnuah Meitei Presbyterian Kohhran chu Presbyterian Church of India General Assembly hnuai Administrative Unit ni turin April 20&21, 2013 khian a hawn a ni ang.

PCI hnuai hian Synod pariat a awm mek a, Synod dinhmuna la hlan kai remchang rih lova ngaih, Synod ni tura buatsaih an awmin PCI General Assembly enkawlina hnuai Administrative Area/Unit-in dah an ni thin a; Karbi Anglong-a Presbyterian Kohhran pawh hetiang hian kum sarih lai enkawl a ni tawh. PCI General Assembly Officer kaihhruaina hnuai hian Synod puitlinga an awm theih dan tur kawng zawnpui an ni.

INKHAWMPUI PALAINA

PCI General Assembly hnuai Synod Inkhawmpui hrang hrang leh Mizoram Synod nena inpalai tawn Kohhran dang inkhawmpui Synod aiawha kal tura ruatte an kal mek zel. February chawlhkar thumnaah khan Synod Moderator Rev. Lalramliana Pachuau pawh KJP Synod Sepngi Inkhawmpui hmanpuiin Shillong-ah a kal a, Synod Inkhawmpui hi March leh April velah an hmang deuh ber hlawm a ni.

NUN DAN

NUN KAWNG

Bawlhhlawh leh tui chhia kan paih leh theh thang dan hian thenawm leh khawtlanga kan rilru putzia thui tak a lantir a. Motor kawng insukna tui chhia kan paih hian kawng a tichhe awlsam bik hle a ni tih kan ngaihtuah ngai em? Bawlhhlawh leh tuichhia te hi a paihna tur awm rengah paih ila a tha ber mai.

Thenawmte ram lamah kher bawlhhlawh paiha, tui chhih theh hian thenawmte chu kan hmusitin kan pawisa lo va, thin ur mah se pawl kan ti lo tihna a ni. A ruka kan tih apiang hi sual a nih avangin kan thiltih lain thenawmten hmu lo mah se, a titu tan a nuam ngai chuang na hek lo. Thil tih that hian lawm kan hlawh a, thil sual kan tih chuan thiam lohvin kan awm.

In chhawng sang atanga thingpui in bang nawi kawngpui lama paih te, tui bur hmuam dak hnu chhik te hi - a lo dawngtu nih chuan a nuam lo teh asin! Chakai ei hnu kawmkawraw leh chengkawl hip hnu te pawh hi uih lovin sang viau mah se thenawmte atanga thil dawnah chuan a nuam chuang lo. Miin in chunga an tiha in duh tur ang bawkin, mi chungah pawh ti ve rawh u (Mat. 7:12) tih – Dan leh Zawlneite thu hi a la tha fan a; zawm tlâng ila thenawm tha kan ni ang a, inthenawm khawven pawh a nuam sawt mai dawn a lo ni (TZ).

HMEICHHE INKHAWMPUI LIAN

Mizoram Presbyterian Kohhran Hmeichhe Inkhawmpui Lian vawi 45-na chu March 8-10, 2013 chung hian Republic Veng Field, Aizawl-ah hman a ni a. Inkhawmpui Thupui chu, “**Tho la, i Pathian ko rawh,**” (Jona 1:6) tih a ni. Thu zir atan **Habakuka Lehkhahu** thlan a ni a, NI Rosy Zoramthangi, Lecturer, ATC-in a zirtir thin. Zoram hmun hrang hrang atangin palai an kal tha hle a, he thu buatsaih lai hian report kimchang hriat theih a la ni lo.

A thlengtu bial 4-te an inbuatsaih nasa hle a; counter eng emaw zat siamin palaite hi Venghlui bial, Republic veng bial, Bethlehem bial leh I.T.I. Veng bialahte an thleng a, ram pawn lam, Presbyterian Church of Wales atangin he inkhawmpui chhim hian PC Wales Ex Moderator te nupa an lo kal bawk.



Ral Vengtuin Tûmkau Ni thuchah a dawn thar a sawi dawn avangin kohhran mipuiho chuan Biak In an thleng hma hlawm hle a. Dar hmasa a rik chuan Biak In chhung an khat tlat tawh a. Chairman a han din a, tih tur dangte an han tih zawh chuan Ral Vengtu chuan a thu dawn thar chu Pathian thu a chhiar zawh chuan a han sawi tan a. “Lal Isua ropui taka Jerusalem-a a luh tuma a chuanna sabengtung khan mipui chawimawia han awm vel kha nuam a lo ti khawp kha a lo nia! A chung a puan an han phah te, a kalna tura an puan leh chhawl an han phahsakte kha nuam a ti hle a lo ni a. Kum khat zet a vei hnuah pawh khami ni kha a rilruah a la chhâm reng a, khatiang boruak kha han tawn leh a chhâk avangin ama thuin a va kal leh a. Tu mahin ka ui ka ar an lo ti si lo va. A zun leh êkin mi khawlai a tihbawlhhlawh avangin miten an lo vuain an lo ûm hrep a. Thlansa phulkaiin zak takin an in a thleng leh ta a.

“Chutiang deuh chuan - keini mihringte ngei pawh kan mawina te, kan ropuina te, chawimawi kan hlawh ve thinna zawng zawng pawh hi Lal Isua vang zel a ni a. Lal Isua kan phurh loh hun hun kan mualpho hun a ni mai dawn a ni,” tia a han sawi chuan ‘Amen’ leh ‘Halelui’ a hlawh nasa hle a. Inkhawm ban lamah chuan rawih zui zel an duh thu an sawi nak nak a.

ATC-AH PATHIAN THU LAMA DOCTOR ZIR THEIH DAWN TA

Mizoram Presbyterian Kohhran enkawl Pathian thu zirna, Aizawl Theological College (ATC) chu Senate of Serampore College (University) chuan Pathian thu zirna sang ber, Doctor of Theology zir theihna turin a pawm fel ta. Heti hian India rama Pathian thu zirna lama sulsutu Senate of Serampore College (University)-in doctorate degree zir theihna tura College tlem te a pawm zingah a tel ve ta a ni. ATC hian kumin June thla atang khian Theology leh Missiology-ah doctoral studies zirna hi hawn nghal an tum a; New Testament-ah pawh qualified zirtirtu an neih belh hun hunah hawn theih tura ruahman a ni baw. Mizoram Kohhran chanchina thil pawimawh leh chhinchhiah tlak tak a ni. ATC hian M.Th. zir thar tur mi 27 leh B.D zir thar tur 24 admission an ti mek baw.

KTP ROREL INKHAWM 2013 THU LEH HLA

Ruahman lawk angin KTP Rorel Inkhawm chu March 1-3, 2013 chhung khan Lunglei Chanmari Kohhran Biak Inah Lunglei Chanmari Bial KTP leh Venglai Bial KTP-ten an inthlen tawm a, rorel palai kal dan hetiang a ni:-

1. Central KTP Committee	-	21
2. Bial aiawh palai	-	142
3. Branch aiawh palai	-	623
4. Synod Puipate	-	3
5. C. Koh. Hmeichhe Comm.	-	2
6. Minister/Pro Pastor/Upate	-	16
7. Chhimtute	-	2
Belh khawm		809

Biak In kawt zawl leh a sir tuakah hulhliap tha tak zar zawm a ni a, Biak In thlang basketball court-ah Fellowship neihna tur bik Stage tha tak 34'X 24' siam a ni baw. March 2, 2013 (Inrinni) chawhnuah Saikuti Hall-ah ‘Fakna Inkhawm’ hlimawm tak hman a ni.

Rorel tlangpui hetiang a ni:-

1. Kum 2015-a KTP Rorel Inkhawm hmanna turin Mission Veng Kohhran Biak In ruat a ni.
2. Kum 2016 KTP General Conference chu Champhai-ah ngah a ni a, Champhai khawpui chhunga Bial KTP-in Joint-in an thleng ang. (Kum 2014 KTP General Conference chu Khawzawla hman tura lo ruat fel sa tawh a ni).
3. Central KTP-in ram pum huapin Counselling Training buatsaih tura tih a ni.
4. “Kohhran Thurin Hrilhfiarna hi uar zawka kan zir theih nan Central KTP-in hma la rawh se,” tih a ni.
5. Kum 2014-2015 KTP kum puan Thupui atan ‘Pathian tawh tura inpeih’ tih thlan a ni.
6. KTP Budget 2013 - 2014 ruahman Rs. 20,00,000 pawm a ni a, KTP Synod budget head lama mi, Rs. 12,93,000 nen a vaiin Rs. 32,93,000 a ni.

KTP Rorel Inkhawmah hian Special Item neini Mizorama Pathian fakna hla sa thin, zaithiam lar tak tak eng emaw zat an fuan khawm a. Rorel leh Inkhawm hrang hrang hi Synfo-in videalain JB Cable leh LDF Cable TV-ah live-a pek chhuah a ni a, LPS-in Aizawl lama en theihin an tichhuak thei baw.

SYNOD HOSPITAL, DURLANG JANUARY, 2013 CHHUNGA THILPEK DAWNTE

I. CHARITY FUND

1. Pu D. Enga & Family, Laipuitluanga	Rs.	10,000
2. Sikkim Manipal University, Mizoram Centre	Rs.	20,000
3. Pu Lalnunsanga, Durtlang Dawrkawn	Rs.	2,000
4. KTP, Damparengpui Pastor Bial	Rs.	1,000
5. Pu Rohmingliana te chung,		
Electric Veng, Aizawl	Rs.	1,450
6. Upa K. Zakamlova, Pharmacist,		
Synod Hospital	Rs.	2,000
7. Saipum Presbyterian Kohhran	Rs.	2,000
8. Pi R. Lalbiaknungi Chaltlang South	Rs.	4,000
9. KTP, Sateek Pastor Bial	Rs.	2,000
10. Pu Lalzawmliana, Saron Veng	Rs.	500
11. Sakawrtuichhun Kohhran	Rs.	1,500
12. Sialsuk Hmunchung Kohhran	Rs.	5,000
13. Unknown (Mi panga hnen atangin)	Rs.	6,415
TOTAL	Rs.	57,865

II. THISEN PETE

UNIT PEK ZAT

1. KTP, Chawnpui Vengthlang Branch	34	Units
2. KTP, Jubile Branch	40	Units
3. KTP, Venghnua Branch	69	Units
4. KTP, Saikhamakawn Branch	27	Units
5. KTP, Bungkaw Pastor Bial	57	Units
6. Eureka Hostel, Khatla	13	Units
7. YMA, Ramhlun Sport Complex Branch	26	Units
8. NIELIT, Zungtui	95	Units
TOTAL	361	Units

III. THIL DANG PETE

1. KTP, Josua Group, Sihphir Neihbawih	Wall Clock 2
2. F. Sungkawii, ANS (Rtd.), Leitan	Damdawi chi hrang hrang 34 (Rs. 11,858 man)
3. Julie Laltanpuii, Mana International	Istiri leh Heater
4. Leitan Presbyterian Kohhran	An Kohhran kum 40-na Souvenir Bu 2
5. Genesis Enterprise, Millennium Centre	Photometer 5010 (Rs. 250,000 man)
6. KTP, Khawhai North Pastor Bial	Thutthlengsei 10
7. Rev. VL Zaithanga & Family, Khatla	Lehkhau 11 (Lawmna Thuruk)

Khawngaihna leh duhsakna avanga kan Lalpa Isua Krista hminga thilpek min petu zawng zawngte hnenah kan Lalpa Isua Krista hmingin lawmthu kan sawi tak meuh meuh a ni e.

Sd/-
(REV. C. LALBIAKHLUNA)
Chaplain,
Synod Hospital

KOHRANHOTE HRIATTHIAM DILNA

Synod Newsletter chhutna Synod Press khawh lian chhiain a ngawng kal zelah February thla chhuak Synod Newsletter leh Kristian Tlangau te February thlaah kan thawn chhuak hman lo va; min lo hrethiam hram turin Kohhranhote kan ngen a che u — Editorial Staff, SYNOD NEWSLETTER



Keifang Police veng Kohhran chuan January 8 - 20, 2013 chhung khan Upa H. Zoliana, Gospel Witness Team Speaker ruaiin Camping chhawng hnih leh Naupang Lâng Camp an buatsaih a. Camp-ah hian mi 222 an lut a, Pathian Thlarau Thianghlim pawl tharna Kohhran hovah a thleng nasa hle a. Pathian biak inkhawm te, zing tawngtai inkhawm te nasa takin an pung a, Kohhranhoten an hlawkpui hle.

Champhai Zion veng Kohhran chuan Feb. 4 - 14, 2013 chhung khan Pathian Thuruk Enkawltu Team Speaker Pu Laltindawla ruaiin Crusade an buatsaih a, Kohhranhoten an hlawkpui hle tih thu kan dawng.

Samthang Kohhran pawhin Feb. 15 - March 3, 2013 chhung khan Pathian Thuruk Enkawltu Team Speaker Pu Laltindawla leh a Team te baw ruaiin Crusade an buatsaih a, Kohhranhoten Pathian Thlarau pawl tharna an chang a, an hlawkpui hle.

Buang Kohhran chuan Jan. 13 - Feb. 20, 2013 chhung khan Emmanuel Gospel Team Speaker, Zoramsanga ruaiin Crusade leh Camping chhawng thum an buatsaih a, Kohhranah Thlarau Thianghlim pawl tharna leh harhna ropui tak a thleng a. Ruihhlo ngai leh Biak In thleng pha loten sual sim harhna changin Kohhran boruak a nuam hle. Pu Lalthlamuanate chhungin ran thawhin Kohhranin Pathian chawimawina tum hnih lai an buatsaih baw.

Vaivakawn Kohhran chuan kum riat vel kal taa ringtu awm miah lohna khua zawng chhuaka Chanchin Tha hriattir tuma an beihna hmun Modhutilla (Barak Area)-ah January 24 khan cheng nuai 10 zet senga Biak In an sak chu an hawng. A hawnaah hian Vaivakawn Kohhran leh Vaivakawn Vengthlang Branch Church atangin mi 80 zet, Bus pathum hmangin an kal a. He Biak In hawn inkhawm hi Upa Thangkima Ralte, Vaivakawn Kohhran Ramthar Committee Chairman-in kaihuaiin Barak Area Administrative Secretary thar, Rev. Z.D. Lalhmachhuanan a hawng a. Biak In chhungah inkhawmna hmasa ber neih nghal a ni. Vaivakawn Kohhran Masihi Sangati Zaipawl te he huna zaia rawngbawlna hmangin an kal a. Hawnaa kal thenkhat an hawn hnuin eng emaw zatin Modhutilla leh a chheh velah Gospel Campaign an hmang zui a, Pathian hnathawh ropui tak avangin ringthar an pun belh zel a. Biak In thar hi he hmun chheh vela sawrkar Institute-a Kristian zirilaite pawhin an chhawr theih rin a ni baw.

PRESBYTERIAN CHURCH OF WALES MODERATOR LO KAL

Presbyterian Church of Wales Moderator Rev. David Andrew Jones-a chuan March thla tir lam khan Mizoram Presbyterian Kohhran a rawn tlawh a, Mizorama a cham chhung hian Kohhran hmun pawimawhte fanpui a nih bakah Synod hotute (OM) nen zanriah kil ho paha inkawmhona hun tha tak an hmang.



Rev. David-a hian March 6, 2013 zing dar 9:30 khan Synod Office-a thawktute Devotion hmanpuiin antam chi tehkhin thu atanga thuchah sawiin, "Mizoramah pawh kan Missionary hmasate rawngbawlna langsar lo tak atangin Chanchin Tha a lo to chhuak a. Tunah chuan khawvel ram dang tan pawha chhenfakawm thamin Pathianin a lo buatsaih ta che u a. Mizoram Synod-in rawngbawltu duhawm tak tak pawh min pe a. Ram tam zawkte tana malsawmna nasa tak thlentun tura in than len zel a beiseiawm hle. Wales ram tan min lo tawngtaipui turin ka ngen tak meuh che u a ni," a ti. PC Wales Moderator hian Synod Hmangaihna In tanpui nan PC Wales aiawhin Pound 4,000 lai a pe baw a, Hospital hotute an lawm hle.

FINANCIAL YEAR TAWP

March thla hi Financial Year tawp a nih avangin Synod Office-a Finance lam buaiputute chuan Bial tinin March thla ral hmaa sum chhung lut tura ngenna leh hriattirna an thawn chhuak a, nikum August ni 31 behchhana inchhiarnaa Kohhran tina dan zawh kim zat tar lan baw tur a ni. April thla tir te-ah Kohhran tin thawh dan chipchiar tihchhuah thin a nih avangin ngai pawimawh hram turin Bial tina Synod sum lam enkawltute ngen an ni.

KTP FILM – CHIAHPUAM PARI TLANGZARH A NI

Kum 2012 KTP General Conference rorêl – 'Ram pum huapin thalaite zingah hnathawh chungchang (work ethics), ngaihhlut tur dik (value system) leh rilru lam hriselna (mental health) inzirtirna neih ni rawh se,' tih thu bawhzuina kal zelah Central KTP chuan kum 2010 CKTP Film intihsiaka pakhatna lawmman latu KTP, Chanmari Branch, Aizawl chu film siam turin a ngen a. Anni hian phur taka bawhzuin an film siam, 'CHIAHPUAM PARI' tih chu February 26, 2013 zan khan Chanmari Kohhran Hall-ah Central KTP Leader Rev. Lalrinmawian a tlangzarh a, hemi zan hian film thlir ho a ni baw.

A chungar lan inzirtirna lam hawi hi Central KTP-in kawng hrang hrangin a kalpui a, lehkhahu tê chhuah a nih tawh bakah Radio-ah te pawh Talk Show buatsaih a ni tawh a; tunah hian mi thiamte kawmna video buatsaih leh mek a ni.

RIN DAN HRANG NEITE NENA INKAWMHONA LAM SEMINAR

Presbyterian Church of India General Assembly hnuiaia Communication Committee chuan January 30, 2013 khan Shillong-ah, "Sakhaw hrang hrang rin dan chungchanga inbiak pawh tawna," tih thupui hmangin zir hona (Seminar) a buatsaih a. Mizoram atangin PCI Secretary Rev. Zosangliana Colney leh PCI Communication Committee member pahni – Rev. K. Lalpiangthara leh Upa Lallianzela, Laipuitlang te an kal. Resource person-ah Rev. Dr. Roger Gaikwad, Gen. Secretary, NCCI leh Rev. Dr. Hamris Rymbai, John Robert Theological Seminary-a mite hman an ni.

Seminar-ah hian 'Rin hran neite nena inbiak pawh tawna awmzia leh huam chin' tih te leh 'Chanchin Tha hrihna lama rin hran neite nena inbiak pawh tawna (Inter-faith dialogue) pawimawhnate zir ho a ni a; Seminar-a kalte chuan an thupui zirte Mizoram Synod hnuiaia Missionary ten an hriat ve atana an duhpui thu hahipin an sawi.

MTC-IN SERAMPORE AFFILIATION A NEI TA

Mizoram Presbyterian Synod Mission Board enkawl Missionary Training College (MTC) chu Bachelor of Missiology (B.Miss.) zirna turin Senate of Serampore College (University) chuan a pawm fel ta. Heti a nih avang hian he College atanga passed chhuakte chu India ram hmun hrang hrangah an thiamna (degree) pawm theih a ni dawn ta a ni.